

DISSERTATIO MEDICA INAUGURALIS,  
DE

# MICTU CRUENTO,

QUAM,  
PROPITIO NUMINE DIVINO  
ET

GRATIOSÆ FACULTATIS MEDICÆ CONSENSU,  
PRÆSIDE

ON. D. MICHAELE ALBERTI,  
POTENTISS. REGIS BORUSSIÆ CONSILIARIO AULICO, MEDI-  
CINÆ ET PHILOS. NATUR. PROFESSORE PUBLICO ORDINARIO, ACA-  
DEM. CÆSAR. NAT. CURIOS. COLLEGA,  
FACULTATIS MEDICÆ DECANO SPECTATISSIMO,  
PATRONO, AC PROMOTORE SUO CUM  
HONORIS CULTU PROSEQUENDO,

## PRO GRADU DOCTORIS

Summisque in arte Medica Honoribus, Insignibus ac Privilegiis  
More Majorum Solenni obtinendis,

*Horis ante- & pomeridianis. d. Septembr. MDCCXIX.*

Publicæ ventilationi submittet

## GOTTLIEB GOTSCH,

LIGNIC. SIL.

---

HALAE MAGDEBURGICAE

Typis CHRISTIANI HENCKELII, Acad. Typogr.

# U T C I N CRENTO

PROPOSING THE DESIGN

OF A NEW SYSTEM OF MEDICAL EDUCATION

BY

D. MICHAEL ALBERT

PROFESSOR OF MEDICAL EDUCATION  
AT THE UNIVERSITY OF CALIFORNIA  
SAN FRANCISCO  
AND  
DEAN OF THE SCHOOL OF MEDICINE  
AT THE UNIVERSITY OF CALIFORNIA  
SAN FRANCISCO

PRO GRADU DOCTOR

There is an increasing demand for medical education  
in the United States and abroad.

The following is a list of the names of the

members of the committee

GOTTLOB GUTSCH

Chairman

THE UNIVERSITY OF CALIFORNIA  
SAN FRANCISCO





## PRÆLOQUIUM.



### Non otiosa aut sterilis

*est S. Salviani meditatio in Ep. ad Caturam: imbecillitas carnis, mentis vigorem exacuit & affectis artubus vires corporis in virtutes transferuntur, ut mihi genus quoddam sanitatis esse videatur, hominem interdum non*

*esse sanum: cum quo dicterio convenit S. Ambrosii Lib. I. de Pœnit. cap. 12. effatum: consummatur carnis fortitudo in infirmitatibus: sane haud inelegans hæc asserta de salubritate morborum perhibent testimonium; & quamvis via, qua ad quamvis salubritatem pertingere licet, ardua & variis salebris prædita sit, ea propter vero difficilior & operosior aditus metam non penitus præclodit, neque ultimum scopum infelicem aut perniciosum reddit: per aspera enim ad astra, & honores involvunt labores, imo nullum commodum est, quod non aliquod incommodum secum afferat, ita per ignominiam ad gloriam, per dolores ad honores, per infirmitatem ad robur ut plurimum vitæ humanæ transitus & successus esse conspici-*



untur: uno itaque sublato, tollitur alterum: etenim qui pericula & labores metuit, sed otia & socordiam amat, haud ullum vitæ suæ salutarem reportabit usum: Quod si vero subrostranus aut otiosus quidam tantum gravitatem laborum, periculorum, difficultatum, incommodorum, molestiarum, fastidiorum observaverit, tunc procul erit à vera salubritate & vtilitate agnoscenda & apprehendenda, sed sub constanti tali anxia incommodorum aversione, semper miser erit: Non male hanc meditationem ad generalem morborum considerationem applicare possumus, de quibus multi imo plurimi affirmant, quod adversum, molestum, terribile, sanitati oppositum, periculosum, detestandum, pravum, abominale accidens sit: sicuti homines carnales afflictionem & tribulationem christianorum fugiunt & pro perniciosissimo onere æstimant, licet in illam cadat Lemma illud Herculeæ clavæ inscriptum: *Noxia monstris*: qualia monstra sunt peccatum, mala mundi exempla, corruptio carnis humanæ, sive prævæ cupiditates, diabolus, seductiones mundanæ &c. ita profani nobis videntur illi, qui indiscretim & ita abrupte atque abstractè omnem morbum condemnant atque contemnunt & scio la judicandi ratione pro absolute pernicioso accidenti declarant, cum tamen satis sæpe nulla melior via ad sanitatem & salubritatem sit, nisi per morbum pateat: non jam de eo loquimur quantas utilitates morbidæ afflictiones animæ afferant, sed quomodo multi morbi corporis conservationi directè, essentialiter, absolutè, simpliciter & per se inserviant, ut propterea nobis admodum debilis videatur oblocutio, quasi propterea morbus ad nul-



nullam salubritatem adspirare posset, quia vel multa incommoda involvit, vel quia sub illo sæpe homines moriuntur, aut quia plurimi homines morbis vitam amittunt: quo loco quidem in tantum omnino consentimus, si juxta vulgarem acceptionem morbus dicitur læsio sive fluidæ sive solidæ partis, qualis quidem juxta aliam acceptionem morbus esse haud posset, cum rarius ita immediatè eædem læsiones observentur, & non nisi ex diversis aliis alterationibus agnoscantur, ut ita rectius ex immutatis diversis functionibus atque commotionibus morbus dijudicetur, quæ ipsæ vero proinde ut plurimum aliquid salutaris intentionis & contentionis involvunt: Quapropter diversæ viæ sunt, quibus anima humana tum in moralibus tum in vitalibus negotiis ad salutarem scopum pertendit; quemadmodum in extraordinario casu, statu & periculo eadem extraordinaria methodo utitur, qua commodum suum assequi potest, ut ita interdum incommoda & molesta adminicula ad utilitatis & salubritatis acquisitionem & possessionem necessaria sint: nunc quidem non male ab *Hippocrate* morbus vocatur, licet non exacte definiatur *Lib. de Flat. §. 2. text. 8. quicquid homini molestiam & tristitiam affert: quare Joh. Antonida van der Linden in Select. Med. XV. §. 80. dicit: hoc proprium Morbi est, non sincere hominem sui potentem esse, quin intercedere functionibus ipsius, & variis corpus molestiis afficere & affligere doloribus multimodis: carpit ipse proinde Galenum, & pergit: Galeno de diff. morb. I. ac sæpe alibi definitur morbus, dispositio præter naturam functionem lædens, non male quidem, sed subtilius quam utilius. Ex hac vero morbi appellatione vix quisquam elicere poterit, quod o-*



mne illud, quod hominem vexat aut molestia atque dolore afficit, propterea etiam noxium & absolute perniciosum existat: longe alterius interpretationis atque acceptionis est morbus in mente & declaratione Sydenhamii, qui in limine suorum opusculorum *Morbum nihil aliud esse* dicit, *quam naturæ conamen, materiæ morbificæ exterminationem in ægri salutem omni ope molientis.* Sed ne nimis diu in abstracta tali animadversione hæreamus, mox placet in concreto hanc veritatem demonstrare & quidem eximie dignitatis exemplo & testimonio Hæmorrhagarum variarum, quæ licet quantisper naturæ adversæ esse videantur, tamen non exiguam, sed satis evidentem salubritatem inferunt, ita ut qualemcunque illarum perturbationem aut imminutionem morbida facile alteratio consequatur: & quamvis quædam species spontanearum sanguinis profusionum, alium quam salutarem exitum nanciscantur, tamen accidentales tales decursus atque eventus merito ab essentiali illarum destinatione distinguendi sunt; quemadmodum hac ratione excedentes Hæmorrhagarum successus, non cum legitimo harum statu confundi debent, neque indispositio loci ordinis, temporis &c. cum generali salutari respectu atque applicatione commiscenda est; è qua consideratione facile apparebit, quid in qualibet Hæmorrhagarum specie salubritati aut damno adscribi mereatur: Eo magis vero medicæ artis commodum promovebit disquisitio in qualibet Hæmorrhagia instituta, quomodo partim una cum alia specie spontaneæ sanguinis evacuationis consentiat, & quomodo partim à causis magis tacitis, intimis & principalibus, quam crassis, violentis, crassius urgentibus



gentibus & stimulantibus proveniat, nec non quomodo à merè fortuitis & omni destinatione atque scopo destitutis causis hæmorrhagia una ab altera discrepet, utpote quæ consideratio non infimæ dignitatis esse nobis videtur, cū non negemus, quod quælibet Hæmorrhagiarum species, à causis violentis, fortuitis & confusis ortum capeffere soleat, quæ vero quoad ætiologicam dijudicationem & therapevticam tractationem vix tanti valoris est, ac quæ tacite atque sponte erumpit & procedit: Inter alias tales spontaneas sangvinis evacuationes quæ peculiarem disquisitionem merentur occurrit Sangvinis Mictio, quæ partim ob diversas & illas quidem satis fonticas causas, partim ob exactum aliquem consensum cum alia Hæmorrhagia particulari tali deductione & animadversione digna est: Et cum pars officii nostri sit, quo Inaugurali Specimine, utilem aliquam materiam practicam publica dissertatione proponamus & explicemus, ita hac vice de MICTU CRUENTO agere cum DEO constituimus. Adsit hic summus rerum nostrarum moderator huic præsentī labori gratia & benedictione sua, eundemque & medicæ arti & proximo afflicto utilem & salutarem esse jubeat atque efficiat.

§. I.

**Q**Vando de *Mictu cruento* differere nobiscum constituimus, tunc quidem haud diffitemur, quod facile alicui hæc cogitationes suboriri possent, quasi solem facibus adjuvare velimus, siquidem hæc tractatio inter Doctores Practicos & observatores fermè ex superfluo & abunde commendata & explicata sit, ita ut *rem actam*  
age-



*agere* videamur; utut vero hæc ita sint, tamen cuilibet observationi interdum *explicatione*, nonnunquam *confirmatione*, aliquando meliori *coordinatione*, quandoque ulteriori *applicatione* succurrere licet, hinc nihil sub sole *perfectum*, neque quicquam est, cui non aliquid *addere* integrum sit, propterea vero antea acti labores minimè contemnendi, sed eo magis *commendatione* vel *illustratione* digni sunt, quemadmodum aliquando inter antiquos utiles animadversiones & observationes occurrant, quibus nil nisi *ordo* & firmior *connexio* atque *applicatio* deest: interdum etiam contingit, ut *utiles* quædam considerationes *neglectæ* fuerint, quæ propterea è suis *rueribus* inquirendæ & ad *futuros usus* atque fructus aptandæ sunt: proinde etiam haud tergiversari, sed rotundè edisserere debemus, quod in Mictus cruenti tam *Historica* quam *causali* deductione adhuc *notatu* dignæ circumstantiæ occurrant, quæ pro dignitate sua *nondum* satis *clarè*, aut *nondum* satis *rectè*, aut *nondum* satis *diserte* & accurate, aut *nondum* satis *diffusè* explicatæ & præpositæ sunt: ne vero hæc tantum in *abstracto* significemus, mox placet in præsentī negotio & substrato affectu, annotare, quod *plurimi* respectus versentur circa *crassas* causas, crassosque effectus, & quod *intimiores*, subtiliores fontes, adeoque tacitæ causarum efficaciam & *spontanei* decursus & *consensus* valde negligantur: hinc in reliquis scientiis, circa quas homo vertatur, illa calamitas illeque nævus irrepsit, ut multi certitudinem rei & *fidem* suam *crassis* palpitationibus & *contactibus*, nec non *visionibus* aliisque *externorum* sensuum applicationibus atque usibus consecrent: quanquam vero propterea non consultum sit, aliqua *supponere* aut hariolari, vel tantum *abstractivis* conceptibus inhærere, sed omne studium eò adhibendum est, quo *evidentes effectus* per causas, quas *ingenua ratio* & *probata experientia* subministrat, explicentur & quo concursus *fortuiti*, *violenti*, *irregulares* atque *turbulenti*, ab aliis



respectibus, qui *altioris* indaginis sunt & sub *alio imperio* atque *directorio* stant, neque a causis tantum *laedentibus* & absolute *perniciosiss* pendent, prudenter discernantur; & *hec* consideratio in *communi* mictus cruenti explicatione nobis videtur *desicere*, quem defectum aliquo modo *supplere* conabimur: subinde vero nobis videtur *illa operatio* longè *majoris* momenti esse, quæ non à causis *communibus* deduci potest, sicut mictus cruentus ab *acrimonia* & ab inturgescencia sanguinis, &c. derivatus, longe *frequentius* obtinere deberet, ac quidem vulgo solet: quæ adhuc spectat perutilis illa observatio *consensus morborum* inter se invicem: & cum ex parte *mictus cruenti* tractatio ad hunc *consensum* illustrandum apprimè inserviat, ita *hujus* etiam *observationis* peculiarem mentionem injicere lubet: accedit denique quod hætenus variis occasionibus D. D. Præses *diversarum Hemorrhagiarum*: indolem, scopum atque nexum publicæ inculcaverit, maxime vero & *Menses* & *vomitum cruentum* speciali themate cum *Hæmorrhoidibus* cohærere monstraverit, ita annitemur præcipuè hac occasione, quo commonstremus an & quomodo *mictus cruentus* cum *Hæmorrhoidali* fluxu *communicet*.

§. II.

Neque quidem placet *antiquiorum medicorum distincti*oni inter *mictum sanguinis* & *urinam cruentam*, quam in variis locis *Joh. Raymundus Fortis* allegat, inhærere, quippe quæ tam ad *ætiologicum*, quam *Therapeuticum* usum haud multum confert, quare per *Mictum cruentum* intelligimus & explicamus, illam speciem *Hæmorrhagiæ*, qua sive *simplex* & *sincerus*, sive cum *urina* mixtus *sanguis* mingitur, qui haud eximiè floridus, sed à *sero urinoso* aliquando quantisper alteratus est, unde interdum sub *cruoris colore* atq; *consistentia* emittitur, quando videlicet effusus & affusus *sanguis* aliquamdiu in *vesica urinaria* detentus fuit; ita etiam propiori sensu *cruor* & *cruentum* prædicatur de *sanguine non valde florido*



& *fluido*: neque quidem eapropter hujus Hæmorrhagiæ explicatio & commendatio negligenda & obliteranda est, quia *varius* ad *actualement* effectum & *eventum* pertingit, sed militat varia momenta pro *utilitate* hujus specialis deductiones, siquidem 1) in hac specie Hæmorrhagiæ variæ *peculiare*s animadversiones occurrunt, quæ vulgo *non multum* attenduntur: 2) inservit hæc tractatio ad *uberiorem* Hæmorrhagiarum *illustrationem*, *connexionem* & *rationalem* explicationem: 3) quadrat insuper eo, quo effectus mere *præternaturales* & simpliciter *perniciosi*, *accidentales*, *turbulenti* & *confusi*, ab aliis *organicis* operationibus & *rationabilibus* *directionibus* atque prosecutionibus discernantur: 4) illustrat præterea perutilem commendationem & applicationem morborum, per certas *ætatum* periodos variantium: 5) multum etiam lucis affundit negotii *hæmorrhoidalis* illustrationi & commendationi: 6) hinc non parum utilitatis affert, ad demonstrationem *nexus* morborum cum *Hæmorrhoidalibus* motibus conspirantium, ut *colicorum*, *nephriticorum*, *ischiadicatorum*, *gonagricorum*, *podagricorum*, *arthriticorum* vagorum & quotquot alii hos affectus consequuntur: 7) neque tantum genericè hunc *consensum affectuum* inculcat, sed eximiam utilitatem in commonstrando & certiorando *consensu partium*, *motuum* & *finium* subministrat: adeoque 8) *Praxin medicam* adjuvat, ne ita *promiscuè* cum *crassis*, *violentis* & *turbulentis*, *confusis* & *perversis* causis congregiatur, sed quo propterea 9) *prudenter* dijudicet & discernat motus *naturæ*, à causis *materialibus* & merè *physicis*, quæ *citra alium* respectum per *nudam* partium *læsionem* & *noxiam* corporis offensionem operantur: 10) confirmat porro hæc tractatio illam *observationem* exquisitè practicam, quomodo interdum natura humana *primarias salutes* Hæmorrhagias *vicaria* alia & *secundaria* Hæmorrhagia ex *insolitis viis* succedente, sublevet: 11) nec non confirmat illam utilem *Pathologico-Practicam* veritatem, quod  
pleni-



*plenitudo sanguinis ad plurimos morbos excitandos quadret: & denique 12) viam monstrat, ad quam causam in methodo Hæmorrhagiis & connexis affectibus medendi primarius respectus dirigendus sit, ne in praxi eximia illæ hallucinationes occurrant, dum audaci & infelici conatu repente quælibet evacuationes supprimuntur, neve artifex in nuda Hæmorrhagiarum repressione acquiescat & securus sit.*

§. III.

Quemadmodum vero *Hæmorrhagiæ*, in genere spectatæ, haud affectum quendam *endemium* & certæ tantum nationi proprium constituunt, sed à plurimis diversarum gentium medicis observatoribus allegantur, ita mictus cruentus minime *selectis* & *particularibus* affectibus adscribendus est, ni interdum *specialissimæ* quædam & ab aliis valde distinctæ causæ eundem provocaverint: propterea veteres medici hujus *Hæmorrhagiæ* diversam mentionem injiciunt, sicut *Hippocrates* illius consonis fermè verbis *Secl. 4. aph. 75. 80. & Secl. 7. aph. 39.* reminiscitur, in quibus locis *renum* & *vesicæ* afflictionem & *ἐλκωσιν* sive exulcerationem accusat, sicut *Celsus Lib. 2. c. 7.* de calculosorum urina recenset, quod nonnunquam *sanguis, aut cruentum, aut purulentum aliquid cum ea excernatur*: quamvis vero hic mictus cruentus ex *morbida* quadam causa provocatus compareat, tamen idem *Senex secl. 4. aph. 78.* mictus cruenti *spontanei*, ἀπὸ ταυτομάτης mentionem facit, ubi causam conjicit in rupturam *venæ in renibus* ortam, sicut in *Libro de Internis Affectionibus §. 16. text. 2. seqq.* dicit: *dolores fortiter premunt, velut in priore (scilicet renum morbo) fit autem morbus à labore, cum ruptæ fuerint venulæ ad renem tendentes & postea ren sanguine repletus fuerit: hic ubi hæc patitur, cum urina sanguinem mingit in principio morbi, deinde progressu temporis: hic si quietem corpore habuerit; celerrimè sanus erit:* neque oblivioni tradenda est *Galen*i animadversio, quando in explicando *spontaneo* mictu cruento perruptionem san-



guinis è *venis renalibus* roborare conatur, tunc primum quasi respectum ad *influentis sanguinis abundantiam* habet: id quod clarius *Oribasius* docet, quando circa hunc *spontaneum* mictum sanguineum *abundantiam* sanguinis accusat: præterea Mictus cruenti multiplex mentio occurrit apud *Galenum* & quasi ex proposito de eodem agitur, in *Libro Galeni adscripto de Renum affectuum dignotione & medicatione cap. 2. & 3.* licet in hisce locis ut plurimum hic mictus à *calculo renum* provocatus observetur: ita etiam *Cælius Aurelianus Lib. V. tardarum passionum cap. 4.* differit: *solent sicut in podice, vel fœminarum sinu aut matricis collo etiam in vesica hæmorrhoides generari, quæ fluorem sanguinis præstant, quibusdam intervallis variatum, quod oportet apprehendere prudentem &c.* quo ipso asserto cum *Galeno* pugnat, qui autumat, quod eruptiones venarum non in *vesica*, sed in *renibus* contingat, uti in *Comment. IV. aph 78.* asserit, quod impossibile sit, quo *influentis sanguinis abundantia* in *vesica* perruptionem causetur: ita cum *Aureliano Archigenes* consentit, quando dicit: *ut statis periodis Menses & Hæmorrhoides, ita & certis vicissitudinibus interdum plethora se effundit per renes & vesicam: hoc fit apertis à natura venis:* quam eandem observationem *Avicenna* de mictu cruento allegat & commendat, dum *spontaneum mictum cruentum* explicat: *Heurnius* quoad illud ἀπὸ ταυτοματίας secundum *Galenum* pro *repentina & inopinata* eruptione sanguinis interpretatur, neque pro *spontanea Hæmorrhagia* explicat: unde mox commentationem suam exorditur: *hic ἀπὸ ταυτοματίας non significat ultro: suffecerit vero ex antiquitate aliquot selecta & notatu digna testimonia de mictu cruento ad propositum nostrum spectantia allegasse.*

§. IV.

Præterea haud dissimulare & negare possumus, quod antiquiores medici, plus quam conducit occupati fuerint, in decidenda & exponenda illa circumstantia, an & quando



*mictus sanguinis* vel è *venibus*, vel è *vesica* oriatur: *primus* ad hanc animadversionem occasionem præbuit *Hippocrates*, qui in prædictis locis, ubi de sanguinis mictu loquitur, nunc *renes* nunc *vesicam* nominat: hunc in eadem observatione *Galenus* in *commentario* sequitur, uti in eadem disquisitione laboriosus fuit *Mercurialis*, *Riverius*, *Platerus*, *Lommius*, *Fortis*, *Heurnius*, *Bonetus* multique alii, quæ consideratio vero arti medicæ & usui practico non *primarium* usum pronittit, nisi exinde ad *causam* interdum concludere liceat, inde ille præcipuus usus redundat, ne in *aliam* aut *alienam* forte causam culpam conjiciamus & *Therapiam* dirigamus: interea *signa* illa *discretiva*, quæ ab authoribus allegantur, nonnunquam *equivoca* sunt, ut facilis aberrandi occasio subministretur, siquidem *partes*, *Urinæ* se-et *excretioni* dicatæ, in satis arcta *communione* constitutæ deprehenduntur: neque vero ex hac cognitione illa particularis utilitas emergit, quo per *congrua* adminicula ita *directus* aditus ad loca affecta pateat, uti quidem ex enarratis indiciis partes quædam *seorsim* acculantur: eximiam enim viam habent notus illi *spastici*, quo sese per *plures partes* diffundant: sicuti pathemata *nephritica* non raro *vesicam* urinariam in *consensu* trahunt, licet *primarius* fons in *renibus* existat: & licet nonnunquam hæc consideratio in uno alterove casu veritatem contineat, tamen *uberiores* notatu perquam dignæ tales circumstantiæ in eodem affectu occurrunt, quæ absolute ad *veram* morbi agnitionem & rationalem atque *fundamentalem* tractationem spectant: Interim haud injusta quidem movetur quæstio, unde sanguis in *spontaneo* mictu cruento erumpat, quæ disquisitio *eo* applicari debet, quo *nexus* motus *progressivi* & functionum *excretoriarum* magis illustretur: & cum non infimi momenti illa animadversio sit, an & unde *spontaneus* mictus cruentus proveniat, ita non inutilis labor erit, *discrimen* inter illam mictionem sanguineam, quæ *vulgo* describitur, nimirum *simpliciter morbi-*



*dam & noxiam & inter reliquam, quæ rarius explicatur & quæ tacitè oritur aut sponte contingit, sufficienter, solide atque perspicuè indicasse: etenim in mictu cruento, è violenta causa provocato, ferme nulla alia consideratio occurrit, nisi quod lesio continui adsit, quæ sangvinem passivo fluxu emit- tit, citra alterius respectus concursum; hunc sanguinis flu- xum propterea simpliciter esse cohibendum & denique soli- citudo adhibenda, ne in affecto loco actualis corruptio inse- quatur, & in hisce indicationibus ut plurimum acquiescunt practici, nisi interdum sapientia & balsamica intermisceant: qualis methodus vero pro mictu cruento spontaneo curan- do non satisfacit, qui longe alio ordine tractandus est, qui ipse proinde variis phænomenis discretam suam prærogati- vam attestabitur: illud vero adhuc hoc loco paucis mone- mus, ne mictus verè cruentus confundatur cum alia ruffes- cente & colorata urina, cujus in Uroscopia passim mentio oc- currit, siquidem interdum in pathematibus nephriticis, hy- stericis, hæmorrhoidalibus anomalicis, colicis, febrilibus &c. urina emissa tale sedimentum deponit, quod facile quis- quam cum sanguine confundere posset; sicut ultro observa- tiones allegari possent, de vino rubicundo cum urina emis- so, sangvinem mentiente.*

§. V.

Sed quo præsens affectus quoad circumstantias suas in- clarescat, placet nunc in ordine Historiam illius proponere: & quoniam spontaneum mictum cruentum digniorem æsti- mamus, quam alterum, qui ut plurimum violento modo & passivè contingit, ita primo loco & præcipuo quidem scopo illius mentionem faciemus; brevibus tamen reliqui mictus cruenti reminiscemur: Est itaque hic mictus cruentus spon- taneus affectus rarior, ea propter tamen minimè oblivioni tradendus: & licet Hæmorrhagiarum seriei accensendus sit, tamen inter vulgo cognitæ Hæmorrhagias, ferme rari-ssimam speciem constituit: ipse vero hic mictus ita constitutus est



est, ut per *initia* interdum *urina* leviter *sangvinolenta*, mox *saturarius* *cruenta*, denique *copiosius sanguinea* excernatur, adeo ut in *fundo* *vasis* nonnunquam *sangvis congruatus* reperiatur, aliquando in reliqua *dilutiori* *urina* *flocculi* & *filamenta* *sangvinis* fluctuent; *rarissime* vero *omnium nudus* *sangvis* citra *urinae* *connubium* mingitur: subinde hic affectus *certae aetati* magis proprius esse observatur, quemadmodum ad hanc observationem *Hippocrates* *viam* *præmonstravit*, quando in *Sect. 3. aph. 31.* *senibus affectus renum & urinae* *excretionem* concernentes adscribit: ita similiter ex *Historia Practica* fluit, quod huic *Hæmorrhagiæ senes* præcipuè, non valde *effæti* & *decrepiti*, sed adhuc *mediocriter vegeti*, obnoxii conspiciantur: maxime etiam hic *miætus* *cruentus* evenit *senibus animo* adhuc qualitercunque *activis*, ad *patheticas*, imprimis *iracundas*, commotiones pronis, *libidini* adhuc *inhærentibus* & *venereis exercitiis* deditis; cæteroquin in *dieta plena, lauta, aromatica*, tenui, *vinosa*, constitutis, interdum *compotationibus* & *inebriationibus* indulgentibus, proinde *multum sanguinem* *coacervantibus*, & ut plurimum *plethoram* *continentibus*, quæ ex *animi, diætæ & regiminis* erroribus variis *suspectis commotionibus* obnoxia est: ratione *temperamenti* in hanc, uti in *aliam* *Hæmorrhagiæ speciem*, inclinant *subjecta*, quæ ex parte de *sanguineo*, ex parte etiam de *Melancholico* *temperamento* participant: quod vero *sexum* attinet, cui hic *miætus cruentus* familiaris esse observatur, tunc quidem & *viri* & *feminae* hac *Hæmorrhagia* corripì deprehenduntur, quæ tamen de reliquo *magis viris* familiaris existit: quando interim *feminae* vel in *junioribus* *annis narium* *Hæmorrhagiis* *expositæ*, vel deinde *largius Mensibus & Lochiis* *purgatæ* fuerunt, vel ex abundanti adhuc in *hæmorrhoidales* *profusiones* & *commotiones* inclinant, tunc ad *miætum cruentum* dispositæ esse conspiciuntur; præprimis si in *dieta plena & lauta* versantur, si *animo* sunt *excitatiores* & *agiliores*, si *patheticis* *commotionibus* *frequentioribus* obnoxia sunt, si frequen-



quentioribus *plethoræ* suæ *commotionibus* subjiciuntur, si desuper in *matrimonio libidinoso* versantur, si *potui spirituo-*  
*so* indulgent, si in inconvenienti *regimine* versantur, si  
 antea frequentia *puerperia* expertæ sunt, quæ singulæ cir-  
 cumstantiæ ad mictum cruentum in *foeminis* excitandum  
 contribuunt: tanto magis in utroque sexu, sub prædictis cir-  
 cumstantiis mictus cruentus ingruit, quando *remedia sub-*  
*tilia, sulphurata, oleosa, crassiora & copiosiora aloëtica & hel-*  
*leborina, elixiria* vulgaria, communia *antinephritica, acro-*  
*ra carminativa, volatilia & similia* ingeruntur.

§. VI.

Eximiae vero dignitatis & utilitatis hæc est confide-  
 ratio, quæ in *Historia Practica* mictus cruenti probe obser-  
 vanda & inculcanda, quod videlicet *hic mictus* facilius & u-  
 sitatus negotio *hæmorrhoidali* in utroque sexu sese immisce-  
 at & quidem si vel *Hæmorrhoides*, maximè vero *externæ*  
 antea *fluxerunt*, nunc vero *perturbatæ* aut *suppressæ* sunt  
 vel si nunquam ad *actualem* quidem *perruptionem* pertige-  
 runt, attamen *moliminibus* quibusdam *hæmorrhoidalibus, hy-*  
*pochondriacis, ischiadicis, podagricis, arthriticis vagis, gona-*  
*gricis, nephriticis* sese prodiderunt, sicuti D. D. Præsidi ta-  
 lis casus constat, ubi vir ultra sexagenarius vegetus adhuc  
 in diætâ bona atque lauta & in mobili vitæ genere constitu-  
 tus, in junioribus annis aliquandiu *hypochondriacis &*  
*spleneticis pathematibus* affligebatur, quæ post mutatum  
 vitæ genus è *sedentario* in *mobile & agile* evanuerunt: post  
 plures annos *nephriticis simplicioribus cruciatibus* vexa-  
 batur, qui post *calidiorum remediorum* usum in *arthriti-*  
*den vagam & afflictionem ischiadicam* convertebantur, in-  
 terea etiam nonnunquam *dolores lancinatorias* in exitu an-  
 & molestias *tenesmodeas* persentiebat: hic posteaquam se-  
 xaginta annorum ætatem superavit, liberalius vino genero-  
 siori indulgere cepit, ex communi illa persuasione, quod vi-  
 num sit Lac senum: cum vero aliquando in feriis quibusdam  
 nuptialibus, quib9 ut *fidus comes* aderat & saltatione & vin-



usu excessum commiserit, post aliquot dies actualem mictum cruentum perpeffus est, quocum multam sanguinis copiam profudit: in quo viro *nunquam* Hæmorrhoides *fluxerunt*, præcurrerunt tamen *molimina* hæmorrhoidalia, & infecutus denique est verus & *perfectus mictus cruentus*: similem casum allegat *Illustris Stablius in Pathologia* ubi de mictu cruento agit, de quo patiente refertur, quod post mictum cruentum & *aliquot post septimanas, sponte fluxerit sanguis per hæmorrhoides legitimè cum sedibus*: ita etiam reminiscitur D.D. Præses, quod à prælaudato Celeberrimo D.D. Stahlio casum de Viro octoagenario perceperit, qui quidem nullas actuales excretiones hæmorrhoidales expertus erat & tamen frequentius mictu cruento laborabat: neque indignam æstimat D.D. Præses illam Historiam, quam ex ore Viri prælaudati audiuit, quin ipsius Celeberrimi Viri verbis ingenuè eandem recenseat: *Fœmina in adolescentia sua vehementibus narium Hæmorrhagiis obnoxia, cum post matrimonium contractum peperisset & aliquot infantes, in iucem edidisset, bene habuit; postquam autem parere, desit, ceperunt ipsi ingruere Cephalalgica vehementissima pathemata, quæ exhibitis medicamentis fortiter purgantibus colocynthiacis simulet semel desiere; incepit verò, inde coxendicum & ossis sacri Ischiadicis spasmis & fixis, quasi doloribus corripì: huic fœminæ licet Menses mediocriter successerint, nihilominus impendere evacuationes hæmorrhoidales, succurri tamen ipsi, aptis remediis, ubi per unum & alterum annum ab ejusmodi malis libera, vixit: cum vero ex animi commotionibus, metu & mæstia agitata esset & in media sui corporis pessima dispositione novo mœrore cogeretur iter turbulenta tempestate fuscipere ibi incidit in copiosum mictum cruentum, sed revera magis evidenter hæmorrhoidalium excretionum vicarium fluxum, (quandoquidem tum temporis Menses in magna confusione & inæqualitate defectu potius, quam, iusto successu ex variis prægressis animi commotionibus,*

C

erant,)



erant,) restituta vero à fluxu sanguinis per urinam, post,, aliquod tempus fluxum hæmorrhoidalem experta est,, quamvis illo tempore non excederet ætatem 36. anno-,, rum: quibus casibus, qua fieri potuit breuitate *communio-*  
*nem mictus cruenti* cum negotio hæmorrhoidali indicavi.

§. VII.

Quando hæc Hæmorrhagia *semel* in aliquo subjecto obtigit, tunc *illum morem* servat, quo *reliquæ* Hæmorrhagiæ præditæ sunt, nimirum, ut *frequentius* recurrere soleat; sub quolibet vero recurso *insolentior* & *immoderatiorem* indolem atque gradum assumit, quod vitium ut plurimum vicariis & secundariis Hæmorrhagiis commune est: quidquod attentione digna est illa circumstantia, quod interdum hic cruentus mictus *certis periodis* erumpat & quidem quando ex *Hæmorrhoidibus suppressis* ortum traxit, ubi hic mictus *illa tempora* servat, quibus *ante hac Hæmorrhoides* fluere siveverunt; quam circumstantiam cum *vomitu cruento* communem habet, sicut enim hic vel cum *moliminibus* vel cum actualibus *eruptionibus* in *fæminis* interdum *menstruos* terminos comitatur, adeoque *Menses turbatos* vicario actu sublevat, ita etiam *mictus cruentus* in illa tempora successivo suo *recurso* incidit, quibus unquam vel *Hæmorrhoides* fluere, vel *motus hæmorrhoidales* intensius urgere siveverant; quæ ipsa consideratio tanto magis nostram animadversionem confirmat, quod hic *spontaneus* mictus sanguineus cum *Hæmorrhoidali* processu non levem & superficiariam *communione* habeat; & hæc *stataria* recursio hujus Hæmorrhagiæ, non aliter obtingit, nisi in *subjectis paulo continentioribus* & ubi antehac hic mictus paulo *moderatus*, lenius & facilius successit, quemadmodum contra *immoderatiore* & *impetuosiores* prosecutiones hujus Hæmorrhagiæ *exactam* rationem temporis *fallere* solent: quo magis vero talis mictus *periodicè* recurrere solet, eo magis *contumax* evadit, imo eo majorem *sensibilitatem* assumit, ut cum maxima *modestia* tractari debeat, aliàs *peri-*



*culosi affectus insequuntur, ut tabidi, hectici, hydropici, atrophici, similesque: longe certiores enim perniciem ininatur repentina & simultanea hujus statarii mictus suppressio: proinde etiam hæc Hæmorrhagia in subjectis valde plethoricis & immoderatio & copiosior existit; ad quem acerbiores successum disponit, si præcedentes Hæmorrhoides, quæ liberalius fluxerunt, repente suppressæ sunt, ubi cum impetu & vehementiori gradu vicarii hi motus in partes, urinæ se & excretioni dicatas ruunt; in fæminis hic mictus paulo moderatior, lenior & temperatior esse observatur, neque ita ominosus est, ac in viris, quoniam illæ in negotio hæmorrhagico administrando magis exercitæ sunt, neque è qualibuscunque anomalis successibus tam facile & graviter alterantur, neque tam subito in periculosas alterationes conjiciuntur: eo periculosior vero eventus è mictu cruento metuendus est, quo magis prægressis motibus & fluxibus hæmorrhoidalibus hæreditaria dispositio conjuncta est; quid quod solenniores & acerbiores apparatus hanc Hæmorrhagiam comitantur, si sanguis est admodum abundans, si per reliquam vitam & narium Hæmorrhagiæ & Hæmorrhoides, aut largiores Menses, nec non copiosa & frequentia Lochia præcesserunt: insolentiores etiam sunt commotiones, quæ hunc mictum comitantur, quando aliqualis spissitudo in sanguine adest, ob quam eruptio sanguinis non modo difficilior, sed & ultima expressio impeditior, molestior & magis dolorifica est: unde in subjectis melancholico-sanguineis majores, contumaciores & intricatiores dolores occurrunt, quam si subjecta de choleric temperamento participant, licet hujus Temperamenti concursus copiosorem sanguinis mictum inferat.*

§. VIII.

Non indignus labor erit, si hanc communionem, quæ inter Mictum cruentum & Menses atque Hæmorrhoides intercedit, aliquot practiciis testimoniis confirmemus; & licet hæc animadversio in præcedentibus jam inculcata & aliquot casibus illustrata & comprobata fuerit, tamen pro ube-



riori hujus negotii commendatione plura testimonia producemus: ita *Riverius Lib. VI. cap. 13.* dicit: quæcunque mi-  
ctionis cruentæ aliæ causæ tradi solent, ut renum imbecillitas,  
simplex eorum apertio, jecoris infirmitas, plethora, Mensum  
aut Hæmorrhoidum suppressio, raræ adeo & insolentes obtin-  
gunt, ut vix unquam solæ mi-ctionem cruentam prætulerint:  
non minus *Hoechstetteri* testimonium meretur, quo alle-  
getur, quando in *Scholio Cas. 2. Dec. 1.* ita eloquitur: fundit sæ-  
pius hæc Hæmorrhoidis (nimirum hæmorrhoidalis externa, quæ  
ramum ad finem habet, qui in viris & quidem surculis mayo-  
ribus in vesicam ejusque cervicem exporrigitur *C. Bauhino*  
*Lib. I. Anat. c. 20.* uti paulo ante dicit) sanguinem in vesicam,  
ut absque vitio renum mingatur, quod in nobili quodam licu-  
it videre & non infimæ famæ medicus de se hoc mihi recen-  
suit: quem locum etiam *Hoeferus* allegat in *Hercule Medico*  
*Lib. 3. cap. 4.* præterea *Mictum Cruentum* ex Hæmorrhoidibus  
suppressis recenset *Forestus Lib. 24. obs. 9. conf. Actius Lib. XII.*  
*cap. 3. Hildanus Cent. 2. obs. 11. sic Paræus observ. Chirurg. Lib. 16.*  
*c. 51.* differit: hujus symptomatis (nimirum urinæ cruentæ)  
causæ plurimæ esse possunt, scilicet sanguinis immoderatio in  
corpore collecta copia, quæ solenni & periodica per Menses  
aut Hæmorrhoidas suppressa evacuatione cursum nunc ad renes  
& vesicam inflectit: quo ordine illam exactam satis sententi-  
am *Nesteri* proponimus, quam *D. D. Præses* in *Disputatione*  
*de Insolitis Hæmorrhoidum viis §. 8.* enarravit, quæ in *A. N. C.*  
*Dec. I. An. 8. obs. 23.* occurrit: his omnibus perlustratis in eam  
sententiam sum adductus, salvo tamen aliorum judicio, ob sup-  
pressas Hæmorrhoides ordinarias mi-ctionem hanc sangvino-  
lentam oriri, ex vena hæmorrhoidali externa, quæ ramum ad  
finem habet, qui in viris & quidem surculis majoribus in vesti-  
cam ejusque cervicem exporrigitur (hæc sunt verba *Hoech-*  
*stetteri*) & quia plerumque dolores in ima pube & circa vir-  
gam



gam, affectum in collo vesicæ esse, per anastomosis venarum propter loci angustiam grumos hos oblongos excerni, uti apud C. Baub. Lib. I. Anat. c. 20. & Hipp. 4. Aph. 75. & 78. Nicol. Serm. 5. tr. 10. c. 19. & Savanorol. tr. 6. pract. c. 19. rub. 19. Cælius Aurelian. de chronic. pass. c. 4. Moeb. Epitom. Instit. med. c. 9. p. 350. Fundam. Medicin. physiol. c. 17. p. 423. Fabr. Hildan. Cent. 2. obs. 11. & alios satis abunde videre est: hanc communionem Mictus cruenti cum Hæmorrhoidibus indicat etiam Heurnius Comment. in Sect. 3. aph. 75. Raym. Joh. Fortis Tom. I. Cent. 4. obs. 15. Hollerius de morbis intern. non minus hanc observationem de mictus cruenti ortu ex Hæmorrhoidibus suppressis allegat Wedelius in Compendio Praxeos Clinicæ Lib. 3. cas. 40. præterea Aretæus Lib. 4. c. 3. diuturn. morb. mictum sanguinis periodicum cum Hæmorrhoidibus comparat: conf. Schenkius Lib. 3. obs. 1. de sanguinis mictu: quæ singula testimonia hunc consensum Hæmorrhoidum cum mictu cruento obfirmant.

§. IX.

Cum hisce observationibus & testimoniis adhuc varia alia cohærent; quibus merito illam annotationem practicam jungimus, quod non pauci medici ad mictum cruentum Hæmorrhoidum apertionem commendaverint, è quibus iterum tantum aliquot testimonia in medium protulisse suffecerit: ita Schenckius Lib. 3. de Hæmorrhoidibus obs. 7. sanguinis mictum Hæmorrhoidum apertione curatum recenset: perinde Ballonius Paradigm. 71. similem observationem commemorat: non minus Riverius Lib. 14. c. 4. ad mictum cruentum ex plethora ortum Hæmorrhoidum apertionem commendat: conf. Hæchstetterus Dec. 1. Cas. 9. in schol. p. 93. Schenkius de Mictu sanguinis Forestus lib. 24. obs. 9.: quo loco adhuc generalia quædam judicia annectimus, dum Riverius, Platerus & Bonetus Mictum cruentum à Plethora generari asseruerunt: huc spectat judicium Hollerii de morbis intern. dum dicit: quibusdam naturis eodem modo per vias urinarias



*sanguis excernitur, quo aliis per nares, venas sedis aut vomitum: ita certo respectu mictum cruentum, cum sanguinis abundantia cohærentem describit. Amatus Lusitanus cent. II. cur. 93. ubi mictum cruentum criticum in juvene sanguinea febre laborante recenset. Sicut vero mictus cruentus cum Hemorrhoidibus perturbatis cohæret, ita etiam cum Mensibus vitiosis communicat, ita ut vicariam menstruam purgationem constituat, cujus observationis passim etiam varia testimonia occurrunt, è quibus etiam aliqua pro confirmatione utilis hujus considerationis proponemus: ita Forestus in loco citato describit, mictum cruentum ex Mensium suppressione ortum, qui post sectionem venæ in talo cessavit: huc pertinet obs. 10. Lib. 3. Schenckii de Mictu cruento: conf. Brassavola Comment. ad aph. 75. Lib. 4. Schenckius Lib. 4. de Menstruis obs. 7. Zacutus Lusitanus H. M. P. Lib. III. Hist. 5. p. 455. dicit: quod Menstruis retentis, Menstrua cum urina misceantur: & Lib. II. Hist. 139. eloquitur: ob hæc provida natura in animantis commodum superantem sanguinem expellere satagit: & Salmuthus Cent. 3. obs. 36. Menses gravidæ per urinam describit: neque pluribus opus erit testimoniis, cum aliæ observationes, quæ insolitas Mensium vias exponunt de hac animadversione practica uberiores confirmationes subministrabunt; unicum adhuc Hæchstetteri testimonium addimus, qui Dec. I. cas. 9. in scholio his verbis utitur: Platerus citato sæpius loco sanguinis mictum loco menstruorum observavit: quod & nos in puellis, quibus ætas menstrua negavit, observavimus, ut cruenta emiserint urinas: non minus Vidus Vidius de Curat. Membr. Lib. X. c. 27. dicit: Mictus cruentus interdum Mensium vices supplet: conf. Bonetus in sepulchret. Anat. Lib. III. sect. 28. obs. II. Hollerius de mictu cruento: Denique hoc loco annotare lubet illam observationem, quod licet ut plurimum Mictus cruentus suspectus sit, tamen exempla consent, innoxii hujus sanguinei fluxus: ita Salmuthus Cent. 3. obs. 47. Mictum cruentum periodicum enarrat, qui*



qui quasi *menstruus* tam diu *innoxius* fuit, qui quam primum *suppressus* fuit, *mortem* intulit: ita in *A. N. C. Cent. 1. & 2. obs. 23. in append. Mictus sanguinis copiosus sine detrimento sanitatis*, recensetur; quæ singulæ hæctenus commemoratæ observationes, longe *altioris* indaginis & dignioris momenti sunt, quam *violentiæ* illæ hujus Hæmorrhagiæ provocationes.

§. X.

Quod vero reliquas circumstantias ad Historiam hujus Mictus cruenti pertinentes attinet, tunc in subjectis quibus *libere* evenit, *tacite* succedit & sine singulari *incommodo*, nisi insolita quædam corporis *lassitudo*, extremitatum *horripilatio*, *appetitus* dejectio, *somni* perturbatio, *animi* languor, *alvi* variatio concurset, profluit tunc *urina sanguinolenta*: aliquando præcurrunt & concurrunt molestiæ & *dolorificæ* sensationes & quidem vel *spasticæ* tractiones, tensiones & constrictiones in *lumbis* vel concurrentes mitiores *ardores* in regione *intimiori* *lumbari*: coincidit nonnunquam insolita *exæstuat*io corporis sive *phlogosis alternans*, cum sensibiliore *horripilatione* tum *extremitatum* corporis, tum regionis *lumborum*: corripit *anxietas* cum *frigido sudore*, affligit *eximius torpor* in corpore, maxime in *inferiori* regione, *animus* est *inquietus* & languidus, *respiratio* quantisper *angustatur*, *alvus* quandoque retinetur, *pulsus* est durus & frequentior, *appetitus dejectus* est, concurrunt aliquando plures *spasmodicæ* & *semicolicæ* commotiones, *vultus* quantisper *pallet*, maxime vero *oculi* concidunt, *vires* successivè *dejiciuntur*, nonnunquam *nausea* & *vomibunda* commotio corripit, *somnus inconstans* est & *turbulentus*: ipse vero sanguinis mictus aliquando *diutius* durat, interdum post *breviorem* moram cessat: quo *diutius* vero continuat, eo *graviora* sunt conjuncta pathemata: experiuntur subjecta sub *copiosiori* affluxu sanguinis aliquem *stimulum* ad *mingendum*, & sub *mictione* nonnunquam *mole-*  
*stias*



*stias* percipiunt, dum non ita *prompte* excretio succedit: tanto *major molestia* affligit, quando sanguis in urethra *congrumescit*, ubi sub aliquo molesto & incommodo *nisu* sanguis *exprimi* debet: & ita *successivè* hic mictus progreditur, ut modo sub *breviori*, modo sub *longiori* mora fatis magna copia sanguinis effundi queat: habent interea etiam conjuncti dolores sua *intervalla*, ut sub tali quasi mictus cruenti paroxysmo per aliquot horas dolor mitior, alibi iterum acerbior reperiatur: quod si etiam contingat, ut in primis suis *initiiis* hic mictus mox *incongruè* obruatur, tunc *dolores* fiunt *insolentiores* & vehementiores: aliqui in regione *pectinis* experiuntur *dolores* tales *tensorios*, *tractorios*, *spasticos*, *ardentes*: & quando contingit, ut sanguis in urethra *congrumescat*, tunc aliquando urinæ excretio *difficilis* redditur, donec *grumi* tales *extrahantur*, qui, ut supra indicavimus figuram *oblongi vermis* continent: aliàs vero color sanguinis non nimium mutatus est, ni *urina acrior* & magis *salsa* fuerit, unde modo *lateritius* modo *turbulentus* color in *urina sanguinolenta* conspicitur: quo *activioris* naturæ fuerint subjecta, & de *choleric* temperamento participaverint, eo *copiosior* non modo, sed & eo *impetuosior* & *dolorosior* est hic mictus sanguinis: interdum etiam cum hac *Hæmorrhagia immoderatus* succedente *febrilis* quædam commotio concurrit: proinde hic mictus *aliquoties* subjecta corripit, *rarius* vero *sine* absoluto *incommodo* aut damno decurrit: in *graviori* affectu *angor* animi & *præcordiorum anxietas* certius concurrit, & post immoderatiorem talem mictum ut plurimum fatis diu corporis *languor* remanet, una cum *pallore faciei*.

§. XI.

Sed ne promissi nostri obliviscamur, paucis adhuc *illius mictus cruenti* mentionem injiciemus, qui ex aliqua *violenta* & *impetuenta* causa provocatus observatur, sed qui in *comparatione* ad mictum cruentum *spontanæum*, cujus ha-

ctenus



Et enus mentio facta fuit, *minoris & indignioris* considerationis & æstimationis est: *frequentius* itaque practici reminiscuntur *illius* sanguineæ mictionis, quæ vulgo *calculo acuminato* imputatur, à quo actualis talis *lesio* derivatur, quando ipse per *spasmodicas* commotiones *renibus* fortius *apprimitur*; qualis *cruentatio* verò haud *ita frequens* est, ac quidem vulgo reputatur, neque etiam *ita facile* evenit, nisi *subjecta* fuerint *magis plethorica* & intensioribus sanguinis commotionibus obnoxia; tanto *facilius* tamen in ejusmodi *exacerbatis calculosis* pathematibus mictus hic sanguineus provocari potest, quando in talibus subjectis juxta *communem* methodum remedia *acriora*, concentratiora, *oleosa destillata*, aut *volatilia, diuretica, lithontriptica & balsamica* adhibentur, quæ etiam ad *hanc Hæmorrhagiam provocandam* perinde *efficacia* sunt, licet calculus *non asperior* existat: accidit aliquando & quidem ante decennium hic loci D. D. Præsidi in honesta fœmina hic casus, quæ frequentius verè *calculosis* afflictionibus laboravit: hæc graviter aliquando *doloribus* calculosis vexabatur, donec post *idoneorum* remedium usum *aliquot* calculi excreti fuerint; sed cum postea non ita *confestim* exoptata sanitas redierit, quin potius, uti calculi mos est, aliquales *imbecillitates*, moderatæ tamen continuaverint, ita impatiens & inquieta fœmina clanculum in scio D. D. Præs. ex consilio & suasu consanguineorum Lipsiensium famigerato quodam spiritu antinephritico utebatur, post cujus biduum usum in gravissimum mictum cruentum incidit, accessit febris, complicabantur affectus aliàs consueti hysterici, status erat in extremo: salvata tamen fuit sub divina benedictione patiens hæc fœmina & cum imposterum melius & accuratius methodo à D. D. Præside præscriptæ obtemperasset, non modo post superatum hunc mictum cruentum, nullum calculum dejecit, sed diu a calamitate calculi immunis vixit: est vero *talis* mictus cruentus admodum *confusus*, dum partim *junioribus*

D

sub-



subjectis evenit, neque æque ut *spontaneus certæ ætati* proprius est, partim *tales periodos* haud servat, ut *prior* solet; subindè etiam *multi calculosi atrocissimis* cruciatibus detinentur, quibus *sine diureticis* tractatis, *nullus* talis cruentus mictus obtingit: multum itaque ad *concitandum* hunc mictum cruentum in *calculosis* disponunt *prædicta remedia*, ut propterea interdum præter meritum *acuminati* & asperi calculi accusentur: *comitantur* vero mictum cruentum, *hæc ratione* provocatum, fatis *exquisiti* & sensibiles *dolores*, concurrentibus *ardoribus internis* & nonnunquam plane *febrilibus* commotionibus, *agrypniis*, magna *virium dejectione*, similibusque suspectis aliis pathematibus: *sanguis* qui in *tali* casu effluit est interdum *floridus* & fluidus, nisi *urina* valde *salsa* hunc colorem alteret: mictus ipse etiam subinde valde *impetuosus* & *copiosus* est, imo in *futurum* facilè iterum *repullulat*, tanto magis si *remedia talia acriora* denuo ordinantur: donec tandem *hectica* quædam ægritudo huic *tragediæ* finem imponat.

§. XII.

Præterea *coactio* & *violento* quodam modo mictus cruentus provocatur, imprimis in subjectis *plethoricis* & de sanguine, *orgasticis* commotionibus obnoxio & cum *sero*, *sulphureo* subtili largius commixto, participantibus, per *diuretica potentioris* & sensibilioris efficacæ, paulo magis vero *præcipiti* & præsentaneo effectû per *cantharidum* usum, præcipuè in subjectis *tenerioris* & *sensibilioris* animi & corporis: quo loco neque *volatilium* remediorum usum excludimus: ita contigit aliquando D. D. Præsidi hic casus, ubi studiosus sanguineo-cholericus Temperamenti valde plethoricus vinosis compotationibus deditus, posteaquam sese ad instantem talem compotationem ex persuasione alterius commilitantis heluonis cum usu Spiritus C. C. præparaverat & deinde strenuè potaverat, in talem mictum cruentum satis copiosum incidit, quem olim sub satis frequen-



quentibus computationibus nunquam expertus fuerat: ita nonnunquam accidit, ut *juniora plethorica* subjecta, imprimis *vini* potui adsueta, *venereis* exercitiis immodice indulgentia, aut frequentius *aphrodisiaca* remedia usurpantia, hanc mictionem sanguineam experiantur, non modo cum *doloribus tensoriis* & sensibilius strictoriis, sed & cum notabili *virium decremento*: excitatur nonnunquam mitior mictus cruenti gradus in *junioribus* subjectis, *plethoricis* & ad *stranguriam* dispositis: sicuti talis casus *D. D. Præsidi* constat de juvene 24. annorum, qui æstivo tempore aliquoties post cerevisiæ non bene defæcatæ ingestionem, sub inferiori stranguria urinam sanguinolentam evacuavit, citra tamen urgentem alium dolorem & citra consequentem noxam: non minus exempla constant, ubi *plethorica* subjecta post assumptionem *remediorum* sanguinem *turgescentium* sanguinem minxisse observata sunt: talis Historia constat *D. D. Præsidi* in puella, quæ imminutum Mensium fluxum corrigere tentavit cum oleo sulphuris therebintinato & larga myrrhæ copia, unde non modo largum Mensium fluxum, sed & mictum cruentum experiebatur: ita in *A. N. C. Dec. II. An. 8, obs. 121.* recensetur *Mictus cruentus ab abusiva assumptione Myrrhæ* provocatus: sic Historiæ prostant de mictu cruento ab *immodica equitatione*, à *contusione* & *allisione* regionis *pectinis* & *lumborum*, à *nimia alvi obstructione*, à *partu difficili*, à *vermibus*, ab *ulcerationibus vesicæ* urinariæ, à *nimia pollutione nocturna*, à *nimis frequenti spermatis ejaculatione* &c. orto, ubi non raro, quotiescunque ita excitatus mictus cruentus contingit, *dolorificæ* quædam molestiæ concurrant; aliquando etiam talis Hæmorrhagia *diutius* durat, quandoque *brevius* decurrit, ut plurimum etiam *alterationes* quædam tam in *animalibus*, quam *naturalibus* functionibus conjunguntur, eoque magis subjecta affligunt: & talis quidem mictus cruentus *hiscæ* modis concitatus, nullam habet *relationem* ad *exquisitam ætatem*, nisi



status *plethoricus* majorem dispositionem ad eundem habere deprehendatur & *juniores* paulo *facilius*, quam *Senes* eidem subjici videantur: neque etiam experientia medicare pugnat aut reclamationat, sed potius exemplis quibusdam obfirmat, quomodo ex *prædictis* causis suscitatus *miætus cruentus*, ni in *futurum* subjecta probe sibi circa easdem moderentur, *frequentius* non modo recurrat, sed & *periculosiora* confectaria introducat: quæ sufficiant de miætu cruento *coactio*, *passivo* & *violento* in medium protulisse.

§. XIII.

Posteaquam hætenus potiora momenta, quæ ad *Historiam* miætus cruenti spectant recensuerimus, placet nunc aliquot animadversiones annectere, quæ *Prognosin* præsentis Hæmorrhagiæ attinent: servabimus iterum hunc ordinem, ut *priori* loco aliqua de miætu cruento *spontaneo*, posteriori vero de *coactio* sive *violento* proponamus: quod itaque miætum cruentum in viris *senioribus* attinet, tunc de eodem *Illustris Stahlius in Pathologia sua* hoc testimonium perhibet: *Qui in miætum cruentum talem devolvuntur senes, vix diu supervivunt, nisi quidem admodum commode atque libere hic fluxus ipsis succedat: & licet hoc etiam ita contingat, tamen nunquam ab omni incommodo & periculo liber est, quin vel successive sinistra pathemata consequantur: tanto citius vero atque gravius damnum imminet, quando hic miætus cruentus vel immodicus, impetuosus & copiosus est, vel frequentius recurrit, ubi citius superveniunt affectus hectici, tabidi, hydropici, œdematosi, &c. neque etiam bene cedit negotium, si hæc Hæmorrhagia confestim supprimitur: qualem suppressionem pressio pede sequuntur, Tabes, Marasmus, atrophia, hectica & quidem in subjectis siccioribus, œdemata vero & ascites in humidioribus; quales tumores hydropici nihilominus tenaciter persistunt & increbescunt, licet hic miætus cruentus denuo recurrat: & quando œdematosi tales tumores repelluntur, tunc affectus asthmatici,*  
*suffo-*



*suffocativi, hectici &c.* consequuntur: quando hic mictus cruentus in *senibus* admodum *plethoricis* & activioris indolis *repente* supprimitur, tunc nonnunquam superveniunt *internæ inflammationes*, aut affectus *apoplectici, hemiplectici* &c. cum *lethali* eventu: quando cum mictu cruento *febris* concurrat, *malum* est indicium, quod ex *Hippocrate* allegavit *Lommius observ. medicin. Lib. 2.* ubi de *Mictu sanguinis & renibus* agit: quando post mictum cruentum *leniorem prægressum*, *tempestivè* fluxus *hæmorrhoidalis* erumpit, *bonum* est indicium: *haud* vero aliquod emolumentum affert *hæmorrhoidalis* fluxus, quando post prægressum *immoderationem* mictum cruentum serius & quidem si nunc affectus *tubidus* consecutus est, occurrit: in *fæminis* hic sanguinis mictus, neque *ita cito*, neque *ita facile* tam *eximiè* periculosos affectus consequentes involvit: neque etiam rationi atque experientiæ repugnat, quod mictum cruentum tam *spontaneum* quam *coactum* minus providè tractatum *verus calculus, ulceratio renum aut vesicæ, tabes & hectica* consequantur, sub quo statu dehinc successive non modo varia *diureseos impedimenta* ingruunt, sed & materia *saniosa* cum *urina* excernitur: quando in mictu cruento *fortiora adstringentia* repente adhibentur, tunc eadem *lethalem ischuriam* post se trahere possunt: quo magis post mictum cruentum *virium dejectio, appetitus defectus & somni perturbatio* continuat, eo *citius* *noxii* effectus & affectus prægressum illum mictum consequuntur: quod vero *coactum* mictum cruentum concernit, tunc ille *tota* sua *indole* & *ratione absolute* quidem *morbidus* est, qui si non providè tractatur, æque *internas ulcerationes* post se relinquit: quid quod evenit, ut in futurum è *leniori* causa *provocari* queat & *indolem spontanei* mictus cruenti referat & simulet: quando vero & *violenter* hic mictus *immodicè* supprimitur, tunc varia incommoda, ordinariam *diuresin* turbantia, superveniunt; interim hic mictus neque *tam promptè* periculosus



evadit, neque è *mediocri* adstrictoria repressiōe tam facile in deteriorem statum ruit: evenit vero ut hunc mictum sanguinis *semel cohibitum* interdum in futurum affectus *nephritici*, *ischiadici*, *arthritici*, & similes consequantur: quod etiam de mictu cruento *spontaneo* valet, si ratione consecutionum in mitiori statu persistit, ubi eundem in futurum affectus *nephritici*, dolores *coxendicum arthritici*, *arthrico-rheumatici*, *podagrici*, *gonagrici*, excipiunt: *conf. Excell. D. D. Stahlii Disp. de Metaschematismo Morborum*: & hæc quoad *Prognosin* mictus cruenti notanda sunt.

§. XIV.

Traditis hætenus illis circumstantiis, quæ ad *Historicum* conspectum mictus cruenti spectant, nunc ad *Pathologiam* præsentis affectus nos convertimus & in illa exponenda iterum *primo* loco animum applicamus ad *spontaneum* mictum cruentum, de hoc vero mox in limine hujus *causalis* deductionis asserimus, quod *naturæ actus* sit, neque à causis *mere physicis* pendeat, in qua ratione hic *spontaneus* mictus sanguinis, æque ac *aliæ Hemorrhagiæ* spontaneæ à *violento & coacto* sanguinis fluxu *formaliter & essentialiter* discrepat: etenim dum hic mictus *tacitè* oritur, ita vix facile ad *fortuitas & turbulentas* causas provocare integrum est; & licet *acrimoniæ corrosivæ* in sanguine, *vasorum* nimia *inturgescentiæ*, motuum *spasmodicorum* accusatio facilis sit, demonstratio tamen in mictu *spontaneo* non parum difficilis existit: quod vero hic affectus à *natura* pendeat, sequentes rationes evincunt: 1) quod *certæ ætati* proprius sit, neque ita *confuse & promiscuè* corripiat: 2) quod *certis periodis* recurrat: 3) quod *talibus motibus* absolvatur, quibus alias *salutares* in usum corporis cedentes *excretiones* administrantur, qui motus non *tumultuari & confusi* sunt, sed *proportionati & effectui* respondentes: 4) quod per *animi pathemata* invitetur, augeatur & sustentetur: 5) quod *spontè*, & *tacitè* oriatur, neque à *causa communi impellente* provocetur:



tur: 6) quod *alteri* cuidam *salutari* Hæmorrhagiæ sive *difficulter* erumpenti, sive *suppressæ vicaria* quadam ventilatio-  
ne succurrat & inserviat: 7) quod qualitercunque *turbatus*  
atque *suppressus* in *deteriorem* statum delabatur, æque ac  
cum *salutaribus* quibusdam Hæmorrhagiis succedit: 8)  
quod nonnunquam cum *talibus* Hæmorrhagiis *alternet*: 9)  
quod per causas *ex animo* profluentes & *citius* & *efficacius*  
promoveatur: 10) quod *hereditaria dispositione* interdum  
nitatur, quæ frustra *corporeis* causis adscribitur: 11) quod cum  
*similibus* affectibus conspiret, quales perinde cum *salutari-*  
*bus* Hæmorrhagiis *cobærere* solent & denique 12) quod per  
*talía auxilia* hic affectus præoccupetur, quæ magis per *ordi-*  
*nationem motuum naturæ* conveniunt, quam per qualem-  
cunq; *operosam correctionem corporis* & *qualitatū corporearū*;  
quæ considerationes eo præcipue quadrant, quo *passivum*  
mictum cruentum ab hoc *naturæ actu* discernamus, siqui-  
dem hic *spontaneus* sanguinis fluxus ad *certum scopum* di-  
rectus est, cum alter, *violentus* videlicet & coactus ille mi-  
ctus *confusus*, turbulentus & omni respectu *perniciosus* sit;  
& licet *quidam talis* mictus à *morbida* causa pendeat, tamen  
non firma est conclusio, quod propterea *omnis talis* mi-  
ctus cruentus *passivus* sit, cum constanter actiones *sponta-*  
*neæ* ab actibus & effectibus *violentis* & coactis discerni de-  
beant; ob id æque *falsa* esset assertio, quando *spontanearum*  
operationum existentia negarentur, quia etiam *violentaæ*  
& coactæ occurrunt: quemadmodum enim totum corpus  
sub *potestate naturæ* est, ita frustraneum esset eidem dene-  
gare *energiam transferendi* suam *intentionem* in *renes* præ-  
cipue, aut in *vesicam*; sicut è *diversis* corporis *regionibus*  
*sponte, tacite* & libere imo satis sæpe & satis evidenter cum  
eximia *euphoria* sanguis eliminatur, qualis operatio haud  
accurate *nude physicis* potentiis attribuitur; & cum hæc  
Hæmorrhagia non aliunde, quam à *natura* pendeat, ea-  
propter *motus*, quibus *mediantibus* illa administratur,  
tamen



tamen sub reliquo *tacito & spontaneo* decursu, ita sunt comparati, quo *fini*, qui per Hæmorrhagiam intenditur & *energiae* naturæ competant.

§. XV.

Ast cui *scopo* magis *quadrare* videtur hæc sanguinis excretio, nisi ut *sanguis abundans & molestus* exoneretur, quem finem *alias* natura prosequitur; quare cum hoc mictu cruento *spontaneo* omnes illæ circumstantiæ coincidunt, quæ ad *plethoræ imminutionem* respiciunt: etiam subiecta vel *ante hæc actualibus* Hæmorrhagiis obnoxia fuerunt, vel adhuc in *plena dieta* versantur, quid quod interdum *plethoricum* habitum præ se ferunt; subinde *talibus causis* se exponunt, quæ ad *plethoræ commotionem* undecunque quadrant, sive ex *anima* sive aliunde concurrant; inter illas causas vero annotari meretur *venereum* exercitium, quod non modo *animi* immoderatos *motus* excitat, sed & *illas partes* in *consensum* ducit, è quibus mictus cruentus administratur: Quod vero hæc Hæmorrhagia *senibus* propria sit, *duplex* ratio atque causa concurrat, una *proximior* altera *remotior*: quod *posteriores* attinet, tunc *consuetudo occupationis* naturæ in *officina spermatis*, eò disponit, quo *extraordinariæ* tales sanguinis excretiones in *talibus consiniis* exerceantur, in quibus hactenus *natura operosiori* activitate *laboriosa* fuit: quoad *priorem* vero, merito in considerationem venit concursus *hæmorrhoidalis* negotii, quod præcedente etiam ratione nititur; hoc *hæmorrhoidale* negotium cum mictu cruento exquisitè *complicatur* & dum interdum natura diversis vicissitudinibus & internis & externis & subtilioribus & crassioribus *impeditur*, quo *minus congrue* è locis *hæmorrhoidalibus* superfluum & *molestum* sanguinem effundat, ita *alia refugia* quærit, in *alias vias* decumbit & *vicaria* exoneratione *illum defectum*, qui in *hæmorrhoidali* negotio occurrit, *compensare* laborat: quo respectu mictus cruentus



entus *spontaneus* est *actus naturæ*, quo sanguinem *molestum*, quem ob *impedimenta* quædam per *hæmorrhoides* non eliminat, *vicaria* quadam ratione è *renibus* aut *vesica*, tanquam *talibus* locis, quæ apprime cum *Hæmorrhoidalibus* viis *conspirant*, sub *eadem intentione*, quo à superfluo & *incommodo* sanguine corpus suum liberet, *excernit* & *proscribit*: E qua *reali* declaratione facile liquet, quod natura humana mictum cruentum cum *salutari intentione* & *destinatione* suscipiat, nimirum quo sanguinem *abundantem* depleat; sed hæc consideratio facile hanc *objectionem* parit, quomodo *salutaris* naturæ *destinatio* & *sinister* effectus & *eventus* cohæreant, siquidem juxta *superius* traditas *historicas* circumstantias, *rarissime* mictus cruentus *bene* cedit: exinde facile quisquam hariolari posset, quod hæc *Hæmorrhagia* non sit *actus naturæ*: cui dubitationi facile etiam obviam ire volumus, quod videlicet *propter* hunc finem hic mictus cruentus susceptus sit, quod vero *senilis contumacia*, & propensio in eminentes *defectus salutare*s tales intentiones *pervertat*, & propterea ad *alias aberrationes* disponat, præprimis quando ad *insolitas* tales vias non satis *adsueti* sunt senes, & ipsæ insuper *partes* quoad *texturam* & *structuram* suam, ita dispositæ sunt, ut facile in iisdem *labes* quædam oriri queat: tanto minus vero tale negotium in *senili ætate* bene succedere & ad *salutarem* eventum pertingere potest, quando *contumax* senum natura in *præcedente* alio negotio *hæmorrhagico* *turbata* fuit, unde eo facilius *sinistre* præsentis actus prosecutiones, *minus regulares* directiones, minusque *moderatæ* & *continentes* executiones hunc mictum cruentum comitantur.

§. XVI.

Ejusdem fermè tenoris est illa *oblocutio*, qua Mictus cruenti *harmonia* cum negotio *hæmorrhoidali* impugnari  
E potest,



potest, quod Hæmorrhoides *juste succedentes* utplurimum *eminentem salubritatem* inferant, *mictus* vero *cruentus* utplurimum *sinistros* effectus involvat; unde *dissensus* utriusque Hæmorrhagiæ facile demonstrari potest: cui dubitationi vero iterum succurrimus, indicantes quod propterea *mictus cruentus hæmorrhoidalem salubritatem* non contineat, quia in *vicario* actu, modo, motu, scopo & directorio consistit, quia porro *impeditam & turbatam salubritatem* hæmorrhoidalem sequitur, quia *sub diversa anomalia* progreditur, quia in *tali ætate* procedit, ubi non modo *ordinarie* commotiones & functiones *facile deflectunt & deficiunt*, sed & *tanto magis extraordinariæ & præcipue insolitæ* consequuntur: quapropter *alia est naturæ intentio & destinatio*, sub qua præsentem Hæmorrhagiam committit, *alia vero est administratio & executio*: siquidem in *vitali œconomia* natura *salutares* fines prosequitur, sed eosdem *non semper* assequitur. Cum vero natura humana per mictum cruentum sanguinis *plenitudini* autocratico actu mederi laborat, ita pro hoc negotio *eosdem motus* adhibet, quibus *communiter* Hæmorrhagias prosequitur: & hi consistunt in *augmento toni*, quo mediante sanguis *ad partem excretoriam copiosius congeritur*, & denique *eructatur*: id ipsum vero interdum *simplicioribus* congectionibus, interdum sub *concursu & adjumento spasmodicorum* perficitur; unde homines ita affecti, dolores *tensorios, tractorios, oppletorios, angustatorios & concurrentes delassatorios* experiuntur: accidunt nonnunquam *molestiæ ardentes*, quæ à *fortiori* congectione & *affluxu* sanguinis *ad loca excretoria* pendent: quod si vero hic mictus cruentus *repente supprimatur*, tunc vel in *renibus* vel in *vesica urinaria* *ulcerosæ* corruptiones oriuntur, quibus mox *tubidi* affectus superveniunt, dum ob multiplicatam & intricatam hanc *alterationem* natura humana *pristinum* suum

qua-



qualemunque vigorem amittit, motus consuetos deserit, in decrementum senile decumbit, energiam suam a corpore suo magis magisque abstrahit, vel interdum in tali extremitate cum *hædica* febricula succurrit & denique penitus decumbit; ita evenit, ut ab uno irregulari refugio ad alterum nonnunquam delabatur, imo ex uno errore in alterum præceps ruat, donec funestus eventus superveniat: totum verum hoc schema consecutionum ex parte etiam motibus absolvitur, licet ex accidenti & corruptiones & aliæ passivæ lesiones coincidunt: quo spissior porro sanguis existit, eo difficilius erumpit & effluit, aut si ante ultimam excretionem & mictionem congrumescit eo magis molestias causatur dum excernitur: quo impetuosiores etiam sanguinis commotiones præcurrerunt, eo immoderatio redditur mictio cruenta ob concurrentem adhuc orgasmum, quem natura dum semel aperturam affecuta est, potentiori tali exoneratione prosequitur: neque etiam oblivioni tradenda est illa consideratio, quod in *fæminis* hic mictus cruentus spontaneus primario *Menstrui fluxus* vices teneat, sicut in *viris* cum *hæmorrhoidali* negotio colludit: ut ita natura in *Mensium* negotio æque nonnunquam insolitas tales vias feligat & sectetur.

## §. XVII.

Hæc communio mictus cruenti spontanei cum negotio hæmorrhoidali ita accipienda & explicanda est, quod natura humana, quando externas præcipue Hæmorrhoides circa furculos propaginum *iliacæ internæ* & *hypogastricæ* venæ effundere & eructare non potest, tunc eosdem motus congestorios in aliam partem transferat, & quidem in talem, quæ quoad motum progressivum sanguinis per venam cavam inferioris tractus cum hæmorrhoidalis sanguinis fluxu convenit, in quam sanguis hæmorrhoidalis externus successive refluit; applicatur propterea motus ille vicarius ad renes, &



quia locus pro hoc negotio insolitus est, ipsa operatio coe-  
 teroquin *insueta* existit, ita *congestoriae* commotiones cum  
*spasmodicis* conjunguntur, imprimis cum *intimius* intra corpus  
*renum* sanguis congerendus sit: erumpit vero sanguis circa  
*astiola* furculorum venosorum de *emulgentium* profapia,  
 qui propius & *intimius* ad *pelvim* abeunt, quas describit  
*Malpighius de viscerum structura, de Renibus cap. 5. & Mange-*  
*tus in Theatro Anatomico* ex eodem *Malpighio*; quo vero  
 ex hisce *hemorrhoidalibus* locis intra *renes* convocetur vi-  
 carium illud *molimen* hemorrhagicum, ita adhuc *aliae cau-*  
*sa* concurrunt, quarum in *superioribus* mentio facta fuit,  
 quæ eo *recidunt*, quod per potum *diureticum*, frequentius  
*vinosum*, per exercitium *veneris*, copiosiores sanguinis af-  
 fluxus ad *renes* convocentur, quem motum & quam occu-  
 pationem deinde natura in illa afflictione prosequitur,  
 quando motus *hemorrhoidales turbati* sunt aut *impeditius*  
 succedunt: & ex eodem fonte ratio fluit, cur *Mensium vi-*  
*tia* nonnunquam *cruentus mictus* excipiat, si quidem inter  
 alios *Laurentius in Historia anatomica hum. corp. Lib. VII.*  
*cap. 12. controvers. anatom. qu. 11.* hunc *uteri & renum con-*  
*sensum* hisce verbis exprimit: *Renum & uteri societatem*  
*gravidarum & virginum, dum menstrua patiuntur, sympto-*  
*mata, dolores scilicet & tormina lumborum, satis indicant:*  
*Fit autem communio hæc per spermaticas venas, quarum sini-*  
*stra ab emulgente ramo ortum ducit:* ita ut motus sangui-  
 nis *progressivus* per *iliacas & hypogastricas* & deinde per *e-*  
*mulgentes* eminente hac *communione* gaudeat, & propterea  
 natura sub *mensium turbis* intra *renes* & in *iisdem refugia*  
 sua quærat: Quanquam vero *usitatus mictus cruentus e*  
*renibus* contingat, tamen adhuc annotatione digna illa  
 observatio *Anatomico-Pathologica*, qua inter motum san-  
 guinis *hemorrhoidalis* tum *interni* tum *externi*, & inter  
 motum sanguinis per *vesicam urinariam* perinde aliqua com-  
 munio



*munio* intercedit, ob quam sanguis etiam circa *venulas vesicæ urinariæ* erumpere potest, ita quidem ut illa evacuatio æque *Hæmorrhoidalibus & mensstruis* purgationibus *vicario* ministrante actu cohæreat: hæc enim *vesica* *venas* suas, quas curatius *Bartholinus Fr. Sylvius & Spigelius* describunt, in *hypogastricas* dimittit, in quas hæmorrhoidales *externæ* *venæ* etiam transeunt, ita ut sanguis hæmorrhoidalis *externus & sanguis vesicæ urinariæ* in *refluo* suo motu *intra iliacam internam* pertingat: hinc contingit, ut si *Hæmorrhoides externæ* non commode effundantur, tunc natura *haud procul* à locis illis hæmorrhoidalibus motus congestorios *intra vesicam* transferat: ita harum *venularum* illiusque *consensus* mentionem faciunt *Hæchstetterus observ. medic. Dec. I. cas. 2. Baubin. Lib. I. anot. c. 20.* & hæc quidem quoad *consensum* mictus cruenti cum *Hæmorrhoidibus* externis observatione digna sunt: hinc Mictus cruentus etiam cum ejusmodi *affectibus alternat*, qui *illas partes* affligere deprehenduntur, *intra quas* propagines *iliacarum* venarum sese immergunt: meretur vero adhuc animadversionem hæc circumstantia, quod mictus cruentus cum *motu* sanguinis hæmorrhoidali *interno* consentire possit; quemadmodum juxta *Verheyinii* observationem *vesica urinaria* etiam de ramulis hæmorrhoidalis *venæ internæ*, præter *hypogastricas* propagines, participat, ut propterea in negotio hæmorrhoidali *interno* perturbato natura motibus suis hæmorrhagicis in *vesicam urinariam* decumbere queat: talis *parallelismus* occurrit in *utero*, qui quoad *vasa* tam de *iliaca* quam de hæmorrhoidali *interna* vena participat, unde *menses* cum affectibus *hypochondriacis & ischiadicis, lumbaribus* consentiunt: & quamvis *venæ* quæ *vesicam urinariam* ingrediuntur, non *intimius* penetrent, tamen ea propter hic *exitus* naturæ per *vesicam* non *impossibilis* est, licet paulo *difficilior* existat, subinde etiam



longe *difficiliores* viæ occurrunt, è quibus eadem natura cum actu hæmorrhagico nonnunquam spontaneum exitum nacta est.

§. XVIII.

Brevibus adhuc perpendere placet, quomodo Mictus cruentus *violento & coacto* modo provocetur, quales modos in historica tractatione commemoravimus: quod enim illam sanguinis mictionem concernit, quæ calculo renali imputatur, tunc haud quidem *penitus* negamus, quod calculi *acuminati immodestius* in renibus impulsæ & commoti, renes jam aliàs actuali læsione exulceratos *offendant* & in illa *superficie*, qua eosdem contingunt, *dilacerent*, siquidem ad talem cruentationem *immoderate* commotiones corporis disponere solent, ubi *Bonetus in Anatom. Pract. Lib. 3. Sect. 28. obs. 9.* varios tales casus proponit, *Salem. Reisselius in Miscellan. cur. anni 1671. obs. 178.* inprimis ab observatoribus notatur, quod ejusmodi mictiones cruentæ per *equitationes* maximè vero *intensiores* exacerbatae fuerint: proinde cruentæ tales diureses non semper acuminatis calculis imputandæ sunt, cum in affectu calculoso non raro talia *remedia* adhibeantur, quæ renes *stimulant*, & *positive diuretica* qualitate irritant, ut consuetæ *congestoria* sanguinis commotiones, ad *renes* directæ, nunc eò magis *augeantur*, & denique exulceratis renibus talem sanguinolentam eruptionem & sic dictam extravasationem causentur: quemadmodum aliàs remedia cum *drastico* effectû renes *stimulantia*, & continuante caustica efficacia eosdem offendunt, immoderatam *congestionem* sanguinis intra renes & violentam denique eruptionem post se trahunt, uti *cantharides, Linaria, Crystalli Lunæ &c.* testantur: id quod tanto magis in subjectis *plethoricis* & in viis urinariis *sensibilibus* contingit, in quibus etiam mitiora diuretica tales immoderatas *congestionem* ad renes, cum *violento* effectû sanguineæ eru-



eruptionis exeuntes, excitarunt: ejusdem efficaciae sunt remedia *volatilia* in *nonnullis* plethoricis subjectis, quae partim *orgasticam* commotionem sanguinis excitant, partim vias urinarias *stimulant*, adeoque copiosum & impetuofum *affluxum ad renes* provocant, qui interdum cum violenta tali *sanguinis eruptione* excurrit: sic aliquando *immoderata* exercitia *venerea* vario modo mictum cruentum caufantur, dum vel simultaneum & *immensum* *affluxum* sanguinis *intra renes*, ad *vesicam* & *partes spermaticas* provocant, qui sub impetuofa commotione corporis in talem violentam eruptionem definit: non minus post nimis *prodigam* spermatis ejaculationem denique *sincerus* sanguis è locis genitalibus emittitur: sic D. D. *Præsidi* contigit casus, ubi Studiosus plethoricus è vehementiori *contusione pectinis* & fortiori compressione membri virilis in immanem mictum cruentum incidit, quem D. Præses cum injectione Nitrata cohibuit: sic violentæ *inguinum* & *pectinis contusiones* *dilacerationem* venulæ in vesica caufari solent; uti in *plethoricis* subjectis & quibus alias corpus *tenerum* est frequens & acerbior *stranguria* sub *spasmodica* sphincteris vesicæ contractione, talem sanguinis expressionem & mictionem cruentam nonnunquam post se trahit: ad quas principales rationes & considerationes plurimæ reliquæ violentarum sanguinearum mictionum referendæ sunt.

### §. XIX.

Mittimus nunc pathologicam Mictus cruenti explanationem & ad *Practicam* illius tractationem nos convertimus in hac *primò* notabimus potiores *antipraxes* & tentamina practica quæ hunc affectum *offendere* solent iterum vero principaliorem respectum ad *spontaneum* mictum cruentum dirigimus, in hoc itaque nocent *potentes* & *simultaneæ* evacuationes cum multa humorum commotione &



*viarum stimulatione* succedentes: nocent vero vicissim *ordinariarum* excretionum *perturbationes* aut negligentes promotiones: imprimis nocent *simultaneæ* hujus mictus *suppressiones*, tanto magis in *senibus* valde *plethoricis*, *acti- vioris* indolis & *floridioris* adhuc habitus: obsunt *præma- turi* qualiumcunque *adstringentium* remediorum usus, & nimis *frequentes* atque *diuturnæ* illorum ordinationes: *fun- damentalis* etiam error est, quando nulla ratio habetur & consideratio instituitur *conjuncti negotii hæmorrhoidalis* vel aliarum *salutarium* Hæmorrhagiarum præcedentium *primariarum*: nocent *communia* remedia *refrigerantia*, immoderatè *incrassantia*, & valde *acida*, quæ ad va- rios perversos successus & effectus disponunt: nocent vicissim quælibet *acria*, *calefacientia* & humores valde *com- moventia* remedia, tanto magis concentrata, *spirituosa* & *oleosa*: hoc nomine perquam nocent *concentrata* talia re- media *therebintinata*, *succinata*, *anisata*, *sulphurata*, *juni- perina*: ita etiam huic affectui *minimè* quadrant *salia vola- tilia curatoria* scopo ordinata: absint remedia *vulgaria bal- samica* exotica, *acria* quæ in communi praxi in renum morbis commendantur, ut sunt *balsamus Peruvianus*, & *Co- paiva*, *Mumia*, *myrrha*, imprimis *vigente acerbiori* hujus af- fectus gradu: officiunt qualiacunque remedia *salina*, quot quot *renes* moleste *stimulant* & offendunt: ita nocent *ex- terna repellentia*, & *vulgata refrigerantia*: nocent commu- nia *crudiora* remedia *aloëtica* & *helleborina*, quæ motum san- guinis in *inferiores* abdominis regiones *exacerbant*: non exiguum damnum inferunt *communia narcotica*, quæ præ- cipue in *senibus* & in *renum affectibus* cum maxima pru- dentia adhibenda sunt: eò certius, citius & efficacius no- cent *diuretica positiva* remedia, quæ interdum ad calculum profligandum ordinantur, sed eo ipso affluxum sanguini ad renes provocant & exacerbant: nocent *analeptica* &



*roborantia acriora & concentratiora, quæ magis motus exacerbant, quam vires refocillant: neque etiam præmaturus & prodigus ita dictorum specificorum usus confert, quia ad repentinas mictus cruenti obstructions disponunt: nocent terrea illa adstringentia subjecta ex animalibus adversus Hæmorrhagias commendari solita, ut dens Hippopotami, Lapis Manati, Priapus Ceti, quæ non modo repente hunc mictum cruentum supprimunt, sed & negotium hæmorrhoidale eo magis turbant & opprimunt: nocent balnea refrigerantia, quæ repentinis & gravissimis turbis aniam præbent: multum etiam nocent in hoc affectu communia nephritica, quæ calculosis afflictionibus opponuntur, quippe quæ vias urinarias sensibilius stimulant & offendent; proinde etiam ad exacerbandum mictum cruentum spontaneum magis quadrant, speciosa, artificiosa, chymica remedia, siquidem simpliciora & leniora auxilia longe securiorem & certiore efficaciam promittunt: neque denique acidularum usus in hoc affectu aliquam fidam & securam utilitatem affert, cum acidulæ magis vias urinarias stimulent & commoveant, quam leniant & contemperent: hæ singulæ cautelæ spontaneum mictum cruentum concernunt, de quo nobis præcipuè sermo est.*

§. XX.

*Ad positivam mictus cruenti spontanei curam nunc accedimus & monemus, quod in primo hujus Therapiæ limine sollicitè observandum sit, an alvina excretio libera sit, cujus defectus promovendus est per lenia laxantia; cavendo ne actualia & stimulantia purgantia, neve vulgaria aloetica remedia exhibeantur: conferunt potius Rhabarbarina vel in substantia, vel in simplici infuso; nec non passulata, prunata, abstersiva, salia Tartarisata: & si positiva obstructio, firma ani occlusio, flatulentia concursus, siccitas intestinorum adfuerit, tunc clysteres lenientes, oleosi*  
F emol-



emollientes & moderatè roborantes conducunt: proinde dijudicandum est an in hoc affectu *V. Sio* utilis & necessaria existat: quamvis vero hæc sanguinis ventilatio *artificialis* magis *præservatoriè* conferat, haud quidem ita *metuenda* & abominanda est subtractio sanguinis in *senibus*, cum quotidiana experientia *vulgares speculativas* oblocutiones abunde refellat: tanto magis *talis evacuatio* etiam *senibus* proficit, quo magis illi *antehac artificialibus* sanguinis ventilationibus adsveti fuere, quo magis adhuc *viribus* senectute gaudent, quo magis *plethorici* deprehenduntur aut conspiciuntur, quo magis in *dieta lauta*, & *plena* versantur, quo magis *vini potui & aromatum* usui indulgent, quo magis *animo* sunt *activi & præcipites*, quo magis *patheticis* commotionibus sunt obnoxii, aut frequentius *veneri* litant: quodsi etiam mictus cruentus *immoderatio*, è causa *impetuosæ* efficacæ commotus, *patiens plethoricus & sanguis in orgasmica* commotione constitutus fuerit, tunc in ejusmodi *necessitate curatorie Ven. Sect.* admittitur; *extra* has circumstantias vero *præservatoria* conducit, siue in *pede*, siue in *adfectis* in *brachio* celebretur: proinde etiam *præservatoriis* usibus commendanda est in subjectis *hæmorrhoidariis* *hirudinum* applicatio ad *hæmorrhoidalia* loca, cum qua *evacuatione hæmorrhoidali* negotio, cum quo *mictus cruentus* apprimè coheret, *directa* quædam sublevatio accedit: *propius* vero ad *motuum* in mictu cruento occurrentium *congestorio spastico-excretoriorum* mitigationem conveniunt remedia *lenientia & temperantia*: è numero priorum sunt *emulsiva, lacticia, jascula gallinacea, decocta mucilagino-*  
*sa, Gelatina, infusa aquea calida, imprimis herbæ veronica,*  
*pultacea liquidiora*; à posteriorum censu sunt *absorbentia cum acidis saturata & nitrosa* remedia, quæ ad *motuum & humorum contemperationem* conveniunt: quodsi etiam



singularis sanguinis *turgescētor* commotio concurrerit, tunc commode *corallia rubra* præparata prædictis temperantibus remediis conjungi possunt, aut iisdem subjungi potest usus Tincturæ Corallorum parvus, neque *nimis* frequens; & hæc remedia in mictus cruenti cura *præmittenda* sunt, ita ut *mitiori & leniori* effectu ipse mitigetur, cum non securum sit *confestim adstringentia* remedia exhibere, aut curam cum *horum* usu *exordiri*, nam quo *lenius* tractatur, eo *secarius & melius* totum negotium decurrit & vice versa.

§. XXI.

Quando vero *hactenus* recensitis remediis hic fluxus non *obtemperat*, tunc *efficaciora* auxilia, *moderate* tamen *cohibentia*, subordinanda sunt, hæc vel in *incrassantibus* vel *tonicis* vel *selectis sedativis*, vel ita dictis *specificis* consistunt: ad *incrassantia* spectant *Gelatina*, imprimis C. C. *Gummi arabicum*, ceraforum, tragacantha, cum decoctis prædictis combinanda, aut thus, mastyx, succinum, therebintina in forma pillularum aut electuāriorum exhibenda: *tonica* remedia sunt *subtiliores* Croci martiales cum pulveribus *temperantibus* miscendi, ut Croc. Mart. antim. Stahlii, Croc. Mart. Cachect. Quercetani & Zwelfere, antim. martial. diaphoret. Ludovic. Tinctura Martis Tartarifata, Tinctura Vitrioli Martis Tartarifata Ludovici, Tinct. Corallorum, Liqueur mineræ mart. Hassiacæ, huc adhuc pertinent species de Hyacinth. Trochisc. de Carabe: dum vero hæc *tonica* adhibentur, *providè* observandum est, an *alvus libera* sit, quæ si post usum illorum remediorum *deficere* videatur, *lenientibus & laxantibus* remediis in *ordinem* ducenda est: deinde hisce *tonicis* remediis vel *conjugi* vel *subordinari* debent prædicta *temperantia & lenientia*, ne *majorem*, quam confert, *adstrictionem* post se relinquant: neque talia *tonica* remedia *nimis magna* quantitate, aut *m-*



*mis diu* offerenda sunt, sed potius sub subordinatione sufficientis *diluentium* quantitatis admittenda: quando itaque *primarius* impetus hujus evacuationis mitigatus est, tunc salium volatilius usus *tonicum* talem effectum promittit, ubi spiritus C.C. cum Essentia succini & Tinctura antimon. Tartarif. modica quantitate mixtus proficit: quod vero *sedativorum* usum attinet, tunc cum iisdem *cautè* procedendum est, concedimus tamen Cinnabarin, sub emulsionibus Sem. Papav. alb. deinde admittimus MP. de Cyngol. & Tincturam Chaccarill. quæ cum Ess. succin. & Cort. aurant. offerenda, vel quæ cum Tinctura Corallorum mixta citius impetuosum hunc mictum cruentum cohibet: aut potest extractum chaccarillæ cum corall. rubr. ppt. cum C. C. Spec. de hyacinth. & ocul. 69. c. acet. Citr. misceri, qualis pulvis in hoc affectu non inutilis est: quod denique *specificæ* remedia attinet, tunc eadem communiter *subtilioris adstringentis* efficaciam sunt, quæ propterea non confestim in *primis* affectus *initii* usurpari debent, sed quando *alvus liberata* & aliquoties *temperantium* remediorum usus præmissus est: hoc nomine laudamus Essentiam Millefolii cum essentia quadam roborante mixtam, ita etiam conducit succus & decoctum urticæ, aut Equisetum sive in substantia, sive in decocto, aut Hedera Terrestris, Polygonum, Pentaphyllum, Vinca per Vinca, Bursa Pastoris, Virga aurea Gefneri, quales species in decocto, addito quodam roborante subjecto sive Cort. Citr. sive aurant., sive Cinnam. admodum proficiunt, quo hic mictus coerceatur: sed iterum post illorum usum præcavendum est, ne alvina excretio aut ordinaria diuresis deobstruatur, unde diluentia lenientia & temperantia conjungenda aut subordinanda sunt; proinde *Solenander Conf. med. Sect. 3. Conf. 27.* decoctum veronicæ & prunellæ cum vino paratum in mictu sanguinis diuturno admodum commendat: neque conte-

mnen-



mnendæ utilitatis existit: quod vero Agrimoniam & Hypericum attinet, tunc & cum hisce speciebus circumspecte procedendum est, ne suspectam & repentinam adstrictionem causentur: idem censendum est de pimpinella Italica & decocto chamepytios, quod à Sulzbergero pro specifico in hoc affectu habetur: consultius vero agunt & securius procedunt, qui à talibus specificis, quantum per necessitatem & occasionem fieri potest, abstinere: non enim de eo contentus sit artifex, quod miæus cruentus *tantum cohibitus* sit, cum nudam & *crudam* illius *suppressionem* gravia damna consequantur.

§. XXII.

Sicut etiam *vulgo* in *Renum* morbis *topica* remedia ordinantur, ita passim in *miæu cruento* *externa* adminicula commendata observantur, quæ vero haud *singularis* utilitatis sunt, cum inter *renes* & *externam* lumborum regionem nulla *materialis* communio intercedat, ita ut medicamenta *extrinsecus* applicata minime *intra renes* penetrent: *alterius* vero considerationis est *communio motuum*, quam inter *externam* remediorum applicationem & *internam* curationem intercedere observamus, proptereaque eandem non negamus: quo magis itaque in tali statu motus *sensibiles* & delicati sunt, eo major etiam *circumspectio* cum topicis remediis observanda est: sunt qui partim *refrigerantia*, partim *adstringentia* commendant, uti famosum illud Ungventum Comitissæ hoc nomine inter veteres ad hunc affectum adhibitum legitur, quod sicut è multis & potentibus adstringentibus compositum est, ita cum maximo moderamine ordinari debet, ad minimum non convenit, quando affectus in *acerbiori* gradu constitutus est: *lenius* operatur Ungventum infrigidans Galeni: talia topica vero remedia magis conveniunt, quando *primarius* impetus huius affectus *deservuit* &

F 3

quando



quando *lenientia* & temperantia remedia *præmissa* fuerunt, tunc admittimus cataplasmata & fomenta è nervinis, discutientibus & remissius adstringentibus speciebus parata: Quando itaque hic mictus cruentus *remisit*, tunc *circa finem* curæ partim *tonica* profunt, quæ locis hætenus affectis robur conciliant, ne *futuris* humorum infarctibus & *affluxibus* pateant, quo Mixturam è spiritu volatili & Tinctura antimon. tartarif. paratam ordinamus, partim *interna abstergentia*, modeste *balsamica* & *resolventia*, ne *grumuli* quidam sanguinis effusi remaneant: huc conducunt pillulæ balsamicæ Stahlianæ, vel aliæ pillulæ parandæ ex extractis amaris, exigua quantitate Myrrhæ, aut Gummi Juniperino, Therebinthinæ venetæ modica copia, aut in certis subjectis refracta quantitate balsami de copaiva addita; cavendo tamen ne talis balsamus nimis frequenter ordinetur: profunt huc etiam Pillulæ de succino Cratonis: *Præservatur* hic mictus cruentus *V. Sectione* opportuna & *hirudinum* applicatione, maxime vero in aptis subjectis congrua *Hæmorrhoidum* apertione: excretiones *ordinariæ* conserventur in ordine iusto: diæta sit *modica* non valde aromatica, sed *temperata* & *diluens*; imprimis conferunt in diæta juscula *mucilaginosæ*, *gelatinosæ* gallinacæ: profunt etiam moderato usu lacticia & pultacea: potus quidem convenit *sufficiens*, sed non valde vinosus, non admodum *diureticus*, non *feculentus*, *inebriativus*, spissus & *primis viis* turbas inferens: motus corporis sit quidem sufficiens, sed moderatus, non excessivus neque simultaneous: vigiliæ multæ evitentur, animus sit tranquillus, imprimis vero quoad *venereas* concupiscentias & exercitationes maximum moderamen fervetur: interdum moderati *inseffus* conferunt. Quod denique *coactum* & *violentum* mictum cruentum attinet, tunc in illius cura observare convenit, an *alvus* sit *libera*, quæ si adstricta fuerit *lenientia*



*niatur & aperiatur, tunc exhibeantur temperantia; si sub-*  
*jecta fuerint valde plethorica & affectus impetuosus sit, con-*  
*ducit moderata Ven. Sectio:* præterea subordinentur *in-*  
*crassantia, lenientia mucilaginosa, gelatinosa, porro tonica*  
*& cohibentia temperata, maximè decocta interponantur*  
*interna & externa roborantia & denique circa finem subjun-*  
*gantur abstergentia & selecta balsamica, quæ sine magna*  
*humorum commotione & viarum stimulatione operan-*  
*tur: præservatorie vero continentia bona in animo &*  
*corporis commotionibus inculcanda est: Et ita etiam*  
*practicam hanc commendationem obfignamus, Deo per-*  
*solventes humillimas gratias, quod in elaboranda hac ma-*  
*teria vires & intellectum concesserit: cui vicissim hunc*  
*laborem consecramus, insuperque rogamus, quo eundem*  
*gratia sua prosequi velit, ut in sui gloriam, proximi*  
*commodum & medicæ artis emolumentum*  
*cedat,*





